



路燈下个蟾蜍

今晡暗晡就像往日共樣，食飽夜就想行到屋面前，啲幾口仔清清个空氣，分正食飽个量暈个腦筋清醒；順續仔，看幾眼仔屋脣菜園自家種个青菜，分自家有一息息仔成就感！這種習慣，毋知哪時就養成个？反正，係到該時，就想打開大門，行往出！

行到屋前，看著亮亮个路燈四圍，有一大群个水蟻仔，對等電火飛來飛去、飛上飛下。水蟻仔，就好(hau)在落水過後翕熱个暗晡頭飛出來，無就好在落水之前翕熱个天時走出來。隔壁个阿伯、伯姆，係看著水蟻仔，就知愛落大水哩！看該群水蟻仔在電火脣飛，有兜飛恹飛瘵抑係羽翼著傷，失忒平衡，就會跌到路燈下，飛又飛毋走，走又走毋贏。

就在路燈下、大路項，佢實在毋敢相信吾目珠看著个！一、二、三、四、五、六、七、八，總共有八隻、八隻蟾蜍，就在屋面前个大路項。佢當久當久毋識看著恁多蟾蜍，佢話著吾目珠有問題，就遽遽喊吾舖娘行出屋下來看，啊喔！毋會差，確確係！正想講該蟾蜍係毋係跳出大路項來寮涼，就看著蟾蜍脣頭有該兜飛又飛毋走、走又走毋贏个大水蟻。

八隻蟾蜍，在八個絡食个位跡尋食，舌嫵因出因入先食頭前飛毋停動个大水蟻！再緊跳緊逐脣頭該兜飛毋走、走毋贏个大水蟻。過無點半鐘，電火脣个水蟻仔緊來緊少，路燈下个水蟻仔七分蟾蜍食到淨淨。佢看著該八隻蟾蜍還係企在大路項，等等頂高个水蟻仔跌下來，佢恬恬仔行過去，佢兜無發覺，無跳走！係講車仔駛過來，佢兜係毋知好閃，驚怕會同佢兜輾到綿綿，腸肚就洩出來喔！

好得，差毋多兩點鐘个時間，無一臺車仔駛過屋前這條路，無一隻蟾蜍分車仔輾著，該載喔！八隻蟾蜍食到飽飽，跳轉菜園肚項去哩！

作者：邱一帆

☆詞彙學習☆

- 【食飽夜】siid bau` ia：吃飽晚飯。 【確確係】kog` kog` he：確定是。
 【行往出】hang` gong` cud`：向外走出去。 【寮涼】liau liong`：乘涼。
 【大水蟻】tai sui` ngie：一種有翅的白蟻。 【綿綿】mien` mien`：稀爛。

☆文法學習☆

【話著……就……】va do`.....qiu.....：以為……就……。「以為」後接某種情況或條件；「就」後接根據此情況或條件，所採取的作為或行動。

- 例 1：阿明話著今晡日毋會落水，就無帶遮仔。（阿明以為今天不會下雨，所以沒帶雨傘。）
 例 2：阿芳話著佢在阿錦叔屋下，就來阿錦叔屋下尋佢。（阿芳以為我在阿錦叔家，所以來阿錦叔家找我。）